

IN RESTITUTAM REGI

VALETUDINE M
AC PROSPEROS BELLI SUCCESSUS

ORATIO GRATULATORIA,
HABITA UNIVERSITATIS NOMINE,
in Exterioribus SORBONÆ Scholis,

Die Jovis tertiâ mensis Decembris, anno Domini 1744,

A CAROLO LEBEAU, Rhetorices in Grassinæo
Professore.

Et Universitatis jussu edita.



PARISIIS,

Apud THIBOUST, REGIS, nec-non Academiæ Parisiensis
Typographum, in Plateâ Cameracensi.

M. DCCXLIV.

IN RESISTUAM

REGI

VALENTINUS

AC TROPHAEUS BELLOVACENSIS

CAESARIS AUGUSTI

SEMPER PARATI

AD VINCENDUM

ET REGNANDUM

IN OMNIBUS

PROVINCIIS



VALENTINUS

AC TROPHAEUS BELLOVACENSIS

CAESARIS AUGUSTI

SEMPER PARATI



IN RESTITUTAM
REGI
VALETUDINEM
AC PROSPEROS BELLI SUCCESSUS
ORATIO GRATULATORIA.



UOD acerbissimæ calamitatis depulso metu primum ac præcipuum fuerat, ut Supremo Regum populorumque Dominatori, ob LUDOVICUM & Regno & Europæ restitutum, gratias ageremus, ILLUSTRISSE SENATUS PRINCEPS, ILLUSTRISSE PRÆSIDES INFULATI, INTEGERRIMI SENATORES, VIRI OMNIUM ORDINUM SPECTATISSIMI; id absterfis vixdum lacrymis, ardenti omnium studio, damnata voti, persolvere properavit Academia Parisiensis; cæteras


inter non antiquitate magis ac splendore, quàm suorum erga se Regum, suo erga Reges amore facilè Princeps. Nunc ubi concentus ille gratulationum conticuit, jam quietis auribus vestris, ipsius decet exaudiri vocem; quæ ad hunc tandem locum reservata est, ut non repentino quodam gaudii levioris impetu concitata, sed ex infixâ penitus, quæ nunquam defervescit, caritate profecta intelligatur.

Multo quidem ac magnifico spectaculorum apparatu totalè Gallia decorata est: geniali incendio colluxere domus; stellantes per noctem vias illustravit conscripta flammis publica privataque gratulatio; lætitiâ exarsit aër; Urbes ludis, choreis, cantibus personuère. Sed, audacter dicam, AUDITORES, ecce pandimus hodie vobis spectaculum omnium longè pulcherrimum ac jucundissimum: & Regium & vestrum pectus explicare mihi propositum est. Quid vobis hâc ancipiti scenâ suavius, ubi, quòcumque circumspèctetis, nihil nisi magnum, verum, ac perpetui splendoris, in vobis fidem, reverentiam, admirationem, amorem, in Rege justissimas tantorum affectuum causas fontesque videatis.

Quamquam autem vestra singularis in LUDOVICUM voluntas nullâ eloquentiæ copiâ æquari potest, tamen oratio nemini defuerit de Gallorum in Regem suum studio dicenti. Ecquæ gens enim cum Regibus suis conjunctior est, non potestatis metu, aut parendi necessitate, sed sanctissimis vinculis animorum? Alibi plerumque emenda

Regibus est caritas suorum; hîc hæreditaria nascentibus obvenit: alibi Reges imminent cervicibus; hîc sedent in animis: alibi bona malaque Regum vix à populis sentiuntur, vacuo inter utrosque intervallo; hîc quæcumque Regi accidunt, uno tenore pertingunt ad universos. Neque injuriâ apud omnes terrarum populos gloriari posse mihi videmur, cum à paternâ majestatem ortum ceperit Regia Majestas, Regnum apud nos à primâ origine quàm minimum degenerasse; cum omnis Gallica Gens una quædam Familia sit, Principemque non tam ut Regem vereamur, quàm ut Parentem colamus.

Quid nuper in LUDOVICO, quid in Gallis effecerit mutua illa caritas, exponendum suscipimus. Causam agimus gratiosam apud vos, imò vestram. Ostendemus esse in LUDOVICO, cur tali Rege gaudeamus; Gallis, cur LUDOVICUS talibus populis gaudeat, non deesse. Et Regem, & Gentem, quos sejungere propè nefas sit, cuncta ausa non sit ipsa vis fati, una laudatio complectetur. LUDOVICO Galli quantum debeant, hoc primum; quantum reddant, hoc erit alterum caput. Quòd si nihil dignum re, dignum auribus vestris afferre vobis videbor, commendet apud vos dicentem ipsa suavitas argumenti; nec magis nunc meam Orationem, quæ res tantas assequi minimè potest, quàm amoris erga Regem vestri, quod nihil est eloquentius, tacitam quæso vocem audiatis.



P A R S P R I O R.

QUEMADMODUM Reges alicui Provinciæ obirati, ex numero præfectorum eum mittere præcipuè solent, qui ad severitatem à naturâ factus in formidine & armis vim omnem imperii reponat; quos verò è suis maximè amplectuntur, eos placido & clementi præpositorum ingenio beare student: ita summus Arbiter Regnorum, qui depromptas velut è sanctioribus thesauris Regum animas, potentia suæ legatos quoquoersum dimittit, quos mortales punire decrevit, iis Reges imponit ferreos ac tumentes spiritu bellorum; quibus verò indulgere benigniùs, iis Principes elargiter pacificos ac divinâ mansuetudinis indole temperatos. Ecquid enim potest cuiquam genti contingere felicius, quàm **R**EX studiosus tuendæ pacis? Ecquid inquieto Rege ac bellici tumultûs avido damnosius? Alter suorum funeribus mercatur victorias; ipsos laureatos quidem reducit, at iisdem ambustos fulminibus, quæ emiserunt; alter victoriæ fructus populis suppeditat, nullâ clade, nullo gemitu emtos: ille suos non pascit nisi cædibus, non vestit nisi spoliis, periculorum venator; hic suo vellere onustos, succis salubribus & opimo lacte enutrit, Pastor beneficus.

Neque tamen ita diligens custos salutis est, ut ullam gloriæ labem aspergi sinat, suis amabilis, terribilis hostibus; qualis Titus, Trajanus, Marcus Aurelius, deliciæ sui

quondam sæculi , aut nostri LUDOVICUS. Hic enim suorum & pacis , & salutis , & decoris studio fecit , ut quemadmodum sibi nihil ad gloriam , ita nihil nobis desit ad felicitatem.

Natus in ipso diuturni belli ardore REX AUGUSTUS , at pacis ferè statim exceptus sinu , altricem hanc suam quàm ex animo colat , per viginti propè annos , quibus in dulci otio conquievisti , Europa senseras. Eam deinde vi temporum avulsam sibi quàm cupidè retraxerit , non sine admiratione testis fuisti ; cum ipse sibi modum statuit prosperarum rerum , exultantemque victoriam ac dulcibus blandimentis ad se pertrahentem in medio cursu repressit & juvenis & felix. O te , Europa , fortunatam , nisi in eos te fluctus , unde LUDOVICI moderatione emerferas , rursus coniecissent spiritus ingentes illius domûs , quæ Galliæ sæpe infesta , diu colluctata cum Regibus nostris , convulsa tandem fato rerum humanarum , id in ipso occasu visa est meditari , ut ex inclinatis caducisque stirpibus resurgeret major , lætiorque reviresceret. Sed quoniam eâ forte nata est Austriacâ domus , ut adversus suos omnes impetus Galliæ Reges oppositos habeat , venit laborantis Germaniæ subsidio LUDOVICUS : socium Imperatorem , quia jus nihil poterat , armis adjuvit ; ne præceps è folio , in quod legitimè evectus est , exturbaretur Princeps magnanimus ac verè Patriæ Pater : quippe inter cineres ac rudera destitutus , eo se digniorem Imperio gerit , quàm qui cum bello persequuntur , quòd illi per

Patriæ incendia & ruinas alienam coronam petant ; hic Patriæ causâ vel certissima etiam jura deferere paratum sese ostendat. Tam piûm justumque bellum qui suscipit , utrum is frangere pacem , an fractam ab aliis restituere , ac depulsis injuriis stabilire velle dicatur ?

Verum quæ tanta vis coegit te , LUDOVICE , ut è conspectu civium ad arma te proriperes , & carissimum caput cæcis belli periculis objectares ? Nonne consiliis tuis quàm obtemperantem se victoria præberet , quàm fideliter vel absentis auspicia sequeretur , jam priore bello expertus eras ? Nonne cùm adhuc tibi integrum esset , utram vincendi viam inire malles , satis ampla tibi ad gloriam videbatur Caroli inter Reges nostros Quinti sapientia ; qui castrorum expers , otiosus manu , mente actuosus , exercituum habenas è longinquo tenens , in mediâ regni sui statione positus , inde copias , inde consilium ac fortunam suam mittebat , quæ sterneret infestas arces , eosdemque qui nunc ferociter minitantur , Anglos profligaret ? Quæ te res igitur in pulverem , in cædem , in ipsum stridorem mortis abripuit ? caritas tuorum. Hæc singula LUDOVICI vestigia singulis benignitatis ejus erga suos monumentis insignivit.

Durissimæ militiæ curas duobus ab annis paternâ sollicitudine cum suis partitus , eo plus periculi suis decessurum ratus , quo majorem ipse partem sibi capefferet , ex dulcissimæ familiæ retinentis , ex dilectissimi DELPHINI toto animo affectantis amoribus eripit sese & ad bellum erumpit.

erumpit. Sequuntur pacificæ virtutes, quæ fortitudinem humanitate mitigent, leniantque victorias! Quale fuit illud iter, quàm omni triumphali pompâ gloriosius, cum nullo serè apparatu, comitatu nullo, imò longè pulcherrimo, suorum omnium stipatus animis, per instructas vias ordinibus viroꝝ mulierumque, undique ex agris, ex oppidis effusorum, inter vota ac preces & laudes pergeret: illum sibi propugnatoꝝem, illum parentem: ducem ipsum esse velle liberis suis, qui militarent; eorū intuturum manus, sanguini parçiturum: iret felix; maturam ex hostibus victoriam referret; atque ut in manu gloriam, sic in capite suo salutem gentis ferre sese meminisset! Hunc mirabantur, hunc sequebantur oculis, hunc parvis liberis ostentabant; hujus nunquam delendam imaginem læti & spe pleni ad penates suos referebant; belloque & hostibus agebant gratias, quod serenum os, & amicos blandæ majestatis nutus videre sibi contigisset.

O præclaram, ô paterno sensu imbutam, ô Regum omnium palatiis imò pectoribus inscribendam vocem, quam ex ore LUDOVICI Valentiana excepit! Gallia tota sibi dictam arripuit! Cum circa eum trepidarent cives, eum frequentia suâ premerent, ipsi se proximum quisque esse certaret, summo veret unus ex amicis Regiis, & cupidioris fortasse pietatis molestiam repressam vellet; sine, accedant, inquit LUDOVICUS; mihi non possunt esse mei quàm satis est propiores. Rectè tu quidē & verè, REX OPTIME; neque enim periculum est,

ne nimia tibi propinquitate molesti sint, quorum in cordibus habitas, quos ipse in corde geris.

Sed erga nullos clarius enituit LUDOVICI humanitas, quam erga milites, quibus, cum animam REGI suam oppigneratam habeant, REGIS quoque caritatem peculiari jure deberi existimavit. Hic juvat me, AUDITORES, subsequi LUDOVICUM militares cellas ac tentoria subeuntem, audire interrogantem blandius, cibaria gustu explorantem intueri. Integrum vult esse militum sanguinem, quem ipsum Patriæ sanguinem putat; solidas eorum vires, quos velut Imperii nervos flectit ipse ac movet. Quam exquisitæ militibus gregales epulæ videbantur, quas REX præsentia & alloquio condiret! Quam jucundè sapiebat panis ille castrensis, REGIS pertractatus manu, ore prægustatus!

O Reges, quorum pectus eadem, quæ LUDOVICUM bonitate naturæ non imbuir, sublimi Majestatis fastigio subnixi, alieni ignotique vestris, quorum oculis officit perpetuò vobis circumfusa lux, supra Populorum capita in secluso remotoque loco procul habitantes, eam verò captatis felicitatem, quæ quo solitaria magis, hoc angustior est. Quænam maximæ sint vitæ Regalis deliciæ, nescitis. Percontamini REGEM nostrum, quam dulce jucundumque sit dare se familiarem suis, eorum gaudia gaudere, eorum etiam indolere ac mederi malis; qui vel ipse dolor molliter affluit ad animum mirabili quâdam dulcedine miserationis. Conspicite LUDOVICUM in

iis receptaculis morborum , quorum vel odorem averfetur fastidiosa privati alicujus mollities , inter militum in stratis jacentium ordines , in gemitu , in conspectu vulnerum & curationum , in ipso vicinæ mortis halitu versantem. Explorat omnia quæ ad salutem conferunt ; sciscitatur , consolatur , adhortatur , aurum aspergit vulneribus. Et erat in LUDOVICI vultu efficacius quàm in strenuis maximè remediis ad maturandam sanitatem adjumentum : spirabat ex ejus ore ipsa salus , quæ vim insuetam medicamentis adjiceret : eo ipso minuebatur dolor , quòd cum REGI quoque acerbum esse sentirent : nec tardas convalescendi moras opperiebatur alacritas studiorum ; nihil ipsis longius videbatur , quàm dum ad nova certamina , ad nova vulnera properarent ; vitam etiam paternâ REGIS curâ sibi redditam ipsi quàm primùm impenderent. Ecquis autem talibus Militum animis tres Urbes munitissimas paucorum dierum intervallo expugnatas admiretur ? Jam enim à Regiæ benignitatis commemoratione ad LUDOVICI fortitudinem bellicosque successus rapit ardor ille militum , quem humanitate suâ incenderat.

Eloquere Flandria , fatalis area bellorum , in ipso bellicosorum Populorum concursu posita , cruore pinguefacta , horrida munimentis & arcibus , cujus campi plura propè prælia quàm messes numerant , sæpè confepulta cineribus & ad nova incendia citò resurgens , virtutis tot Regum Ducumque , quorum facinora vidisti , peritissima spectatrix , eloquere , ecquem unquam Imperatorem con-

spexeris, in suscipiendo celeriore, audaciorē in agendo, in vincendo clementiore. Nondum castra, nondum obsidia viderat, & jam in re castrensi, jam in obsidiorum ratione nihil concedit exercitatissimis Ducibus: vel primo aditu nihil tironis habet, præter nimis generosos audaciæ impetus; eorum, quæ ad bella pertinent, ignorat nihil, præter periculum. Dum hostes conflatum ex diversis Gentibus corpus diductum disiectumque magnâ mole colligunt; dum in ipso consilio, in ipso apparatu trepidant, jam Menina concidit; jam Ypræ corruerunt. Neque LUDOVICUS ipse, capiti parcebat suo: stetit ante mœnia utriusque Urbis bellicorum tormentorum vapore afflatus; cum hostes, etiam ejus audaciâ conterriti, tanto tam augustæ animæ pretio vincere horrent, obsidentique magis quàm sibi metuerent.

Emicat inter ignes consiliorum particeps, præliorum comes, victoriarum magna pars, spiritus Borbonios & excelsam Proavi animam gerens, Heroum soboles æmulusque CLAROMONTANUS: hunc ad Meninam, hunc ad Ypras egregiè factis insignem quonam pacto remunerabit REX fortitudinis æstimator magnificus. Reperit consanguineo bellatori LUDOVICUS munus & dante & accipiente dignissimum; tot periculorum laborumque præmium ingens; nova pericula, novos labores, novam gloriæ segetem: Furnas attribuit expugnandas; sic longè pretiosiores, quàm si captæ traderentur.

Aggreditur urbem dux impiger, Proavi sui expugna-

tionē celebratam; gaudet familiæ suæ decora recognoscere, campos illos magni CONDÆI virtute quondam insignitos, ipsius cruore propè conspersos; cùm acerrimus Imperator contactu mortis in ipso illo loco appetitus, à tutore Galliæ Angelo servatus est. Eamdē CLAROMONTANUS mortem non timet; fulgurat, tonat, irruit; non sustinent irruentem Furnæ, reditque ad Regem suum victor, splendidi triumphi loco ducens, quòd ad ejus coronas laurum unam manu suâ decerptam adjecerit.

Magna quidem illa quæ dico; & ea tamen, quæ in bellicis tuis laudibus maxima sunt, LUDOVICE, quæ tibi fortasse gratissima, nondum attigi. Hoc enim præcipuè tuum; hoc tibi neque cum ducibus, neque cum militibus, neque cum ipsâ fortunâ communicandum, quòd qui à te obsidebantur, imposito alieni præsidii metu urbis suæ possessione exclusi, te, dum hostis oppugnaret, sibi magis Dominum cuperent, quàm timerent Victorem; te votis, te clamoribus etiam advocarent; in clementiæ tuæ tutissimam arcem totâ studiorum celeritate ruerent. Subigi se non credebant & in aliena jura pertrahi, sed sibi se ac libertati suæ restitui & in familiam adoptari tuam, dum eos Imperio tuo adjiceret. Non pœnitet eos ruinarum, per quas sua felicitas, sua salus ingressa est; tantique fuisse credunt hostem te pati, ut te Rege fruerentur.

Nec vicinas solum gentes LUDOVICO conciliat egregia indoles: hæc non minùs, quàm Europæ utilitas ac juris tuendi studium, felici cùm eo societate devinxit

Regem, ut LUDOVICO ætate supparem, ita & belli & pacis artibus florentem; qui ut omnia apud Borussos Galliarum quàm simillima efficiat, & paterno erga suos animo affectus, & suis carus, Musarum, quarum inter manus adolevit, urbanitatem aspergit suorum ingeniis, & severâ militiæ disciplinâ suos exercitus firmavit; expugnata Pragæ recenti gloriâ nitens; REX LUDOVICI sæculo verè dignus, ut ad cætera utriusque decora ingentis amicitia splendor accederet.

Sed dum Flandriæ gemitus in lætas acclamaciones convertuntur, ecce ex adversâ Galliarum regione æstuat infestis Austriacorum agminibus Rhenus; simulque hærentes eorum lateri belluas in Alsatiam evomit, mixtam ex omni barbarie colluviem, inaudita etiam antea nomina Nationum, è sylvarum montiumque lustris non studio laudis, non amore regnantis, sed solo odore prædæ nuper extractos, non ad vincendum sed ad perdendum natos, quibus pro fortitudine crudelitas est. Jam Gallia sanguinem anhelant, jam inhiant spoliis, jam integerrimas longâ pace & ignotâ sibi felicitate provincias spe & cupiditate devorant.

Quis tibi, Lotharinga, imminèntem perniciem avertisset, quis te ex hostium eripuisset faucibus, nisi primo irruipientium strepitu excitatus Parmæ & Guastallæ victor præsentis animo subvenisset? Quantâ celeritate diductas congregat copias! Ipsis animos, ipsis propè pennas adjicit: volat Conius fulmen Austriacis jam expertum ferens, atque ipse instar fulminis: stimulat dolor, necessitas, ac

paventis Patriæ ululatus; & longum iter præcipiti cursu emensus, suos præ ardore iræque fatigationis expertes hostibus incutit: quid illo conflictu horribilius? Cedit tandem veræ virtuti feritas; & quos ex hostium numero reliquos nox fecerat, per oppletas stragē suorum vias, in cruore suo lapsantes aufugiunt; ac post se relinquunt validum Galliæ munimentum.

Ille quidem tam præclara pugna fortissimum exercitum peritiâ ducis opportunè collocatum, quasi murum quemdam Provinciis nostris prætendebat: sed hærebat in Alsatia visceribus pestis; ardebant omnia clade belli; fidelissimæ Provinciæ faciem fugâ, cædēs, flamma scedaverant. O Tabernæ domus, eruditâ opulentia nobilis, splendidâ domini liberalitate nobilior! Te ne ad illustria hospitia natam stabulanti barbaro militi pro receptaculo fuisse! Nonne te ab insolenti ludibrio defendere debuerat & tutela Caroli, qui vel in bello generosæ mansuetudinis suæ memorem se præstitit, & venerandum Germanis magni Cardinalis nomen? Desinite, hostes rapacissimi, desinite & Rohannorum in Patriam amorem, & illatam vobis ad Harcurio cladem, qui vos prædæ incubantes abstraxerat, vetitâ direptione ulcisci velle: omni magnificentia major Armandus suas opes negligit, amat suos, Præsul non minùs quam Princeps: nullus ad excelsum animum dolor accidit nisi per pectora suorum: unius è suis vitam vel plurium Palatiorum pernicie vobiscum libenter paciscatur.

Audit conflagrantis Alfatiae clamores in medio præteritorum plausu, ac novorum successuum apparatu LUDOVICUS. Quis exprimere verbis possit, quot Regio pectori stimulos nuntius ille infixit; cum quaecumque suis aut instarent mala, aut jam incidissent, unus ipse persentisceret; omnium calamitates caperet unus. Ergo certam sibi & aperto jam itinere præcuntem victoriam deserit, ut ad suos tutandos procurret. Eò parentem avocatur amor, unde periculum suis ostenditur.

Quanta tempestas ad vos provolvitur, Austriaci, si LUDOVICUS incolumis pervenerit! Quàm poenitendum vobis in Galliae limites transitum effecturus est! Tu verò, ô Gallia, quantum LUDOVICO debes, qui tibi totus vivens, ad te totum se referens, pacis ubi decet conservator, ubi bellandum est & benignitatem erga suos retinet, & adversus hostes fortitudinem induit cum lenitate conjunctam. Tantis Regis tui beneficiis quantum rependas, superest ut ostendamus.





P A R S A L T E R A.

EA necessitudo est, conjunctioque Regum atque Populorum, ut suam non in se felicitatem utrique positam habeant, sed vicissim ab alteris alteri mutentur. Ut ex amore Principum oritur Populorum prosperitas, ita gloria Regum efflorescit ex eâ caritate suorum, quæ & mollem se præbeat in Principis malis, & hilarem in bonis, & habeat etiam suos adversus hostem aculeos. Ejusmodi pietatem vobis penitus insidere, ô Galli, & lacrymis, & gaudiis, & facinoribus vestris nuper comprobatum est, in REGIS morbo mæstissimam, in ejus salute exultantem, in tuendâ ipsius armorum famâ animosam, teneram simul & efficacem.

Erecta erat exspectatione Europa: defixis in LUDOVICUM omnium oculis, jam illo fidere velut icti pavebant hostes, ripasque suas trepidi respectabant: jam nexis REGI suo coronis Gallia, silentio suspensa, primas victoriæ captabat auras, in lætos cantus mox eruptura. Ecce venit ad aures, & ad omnium corda penetrat de LUDOVICI morbo funesta vox ac lætuosior, quàm si multæ simul clades audirentur. Hoc nuntio concussa Gallia expalluit. Hic mihi mentem obturbat, ac penè præcludit vocem acerbissimi temporis recordatio: descendite in animos ipsi vestros, AUDITORES, & impressa penitus lineamenta dolorum, quanquam recentiore gau-



dio ferè deleta, agnoscenda tamen, relegite. Nonne illam consilii vim, illumvigorem animi, juventæ florem, beneficam indolem, victoriam ipsam divelli à votis & eripi gemebatis? Nonne omnes privatarum rerum sensus obstupefecerat publicus pavor? Uni LUDOVICO templa omnia fervebant obsecrationibus ac votis: ibi permixti omnes ordines, omnis ætas, affusi altaribus, matres juxta liberos prostratæ, modò tristissimis vocibus, modò tristiore in tantâ frequentiâ silentio, quod suspiria tantum singultusque abrumperent, LUDOVICI suamque simul incolumitatem ab omnipotente exposcebant; ipsa ipsa etiam egestas piâ mercede REGIS vitam redimere velle, & in Religionis sinum certatim effundere victum tenuem & quotidianos sudores. Neque diurnis augoribus finem faciebat ipsa nox: insomnis ante aras civitas, in precibus pernoctans, divinam clementiam amicâ vi & gratissimo quodam obsidionis genere urgere perseverabat.

Jam verò è templis quæ trepidatio per vicos rogitantium, respondentium, auscultantium! Qui concursus ad Nuntiorum publicorum ædes! Ubi conferti inter se, ad omnem auram, ad strepitum omnem sese circumagentes, eodem unusquisque habitu animorum, quo quis æger gravi morbo deprehensus horribilem de vitâ vel morte suâ sententiam expectat, stabant, animi pendentes: ut quisque nuntius adventaret, occurrentes obviam, sciscitari, pertrahere singuli, universi obsistere, urgere ac remorari, attollere humeris; quoties hisceret, sollicitudine

examinati, salutem aut luctum avidè arripiebant. Tum emissà vox per omnes urbis vias, per omnes domos uno temporis puncto volvebatur, mœstitiaque simul aut hilaritas, prout læta vel tristia nuntiarentur. Ita est, LUDOVICE; cunctas morbi tui vices experti sumus: hoc unum amor in te noster attulerat discriminis, quòd dolores tuos minùs fortiter quàm tu perferremus.

O mors, quæ cujus prætii sint mortales & verissimè arguis & sanctissimè judicas; quæ personam Regibus, Civibus adulationem adimis; cujus fusca licet & obscura lux, omni tamen aliâ luce certior, Principum virtutes patefacit sensus quæ Populorum, ideòne funebrem istam facem LUDOVICUM inter & Gallos accendisti, ut LUDOVICUS sibi ferè superstes, quantum amaretur à suis, Galli, quantum in LUDOVICO veræ magnitudinis esset, apertissimè cognoscerent. Nunquam enim major existit REX AUGUSTUS, ne tunc quidem cùm infestas Urbes omni bellorum terrore quateret, quàm dum in lecto jacuit defectus viribus ac propemodum exspes. Illic mortem non timuerat, sed eam omnibus famæ splendentem ornamentis, fulgore strepituque armorum, novæ gloriæ dulcedine oculos sensusque fallentem: hîc eam non reformidat, tristem, silentem, inter dolorum stimulos pedetentim & apertâ facie adventantem. Exsolvit sese è victoriæ complexibus, animo magno & erecto: quàm longo ex intervallo despicit & partos antea & speratos triumphos; quos sic relinquere,

quàm mereri fortius est. Nihil jam superest REGI ; quo terris adhærescat , nisi amor in suos , cum ipsius animâ conjunctus.

At tu præsentissimum laboranti LUDOVICO auxilium eras vel absens , ô REGINA , dum provoluta ante Aras , omnes omnium ægritudines in te collectas unâ Supremo Numini exhibens , totius Galliæ vota æquares tuis , & apud Deum una maximè commendares. Desiderio exardescens , impatiens sollicitudinis , madens fletibus proficisceris , provolas , pervenis ad exoptantem. Quot sanctissimi amoris ignibus illuxit ille dies , quo conjugem augustum jam ad vitam redeuntem amplexa , novas ipsi vires precibus tuis impetratas attulisti ! Quantâ simul & miseratione & lætitiâ peresus fuit adventus , cùm ille in Regina mœroris , illa in Rege doloris reliquias agnosceret ; cùm uterque silens , suspirans , in mutui amoris indicia erumpens , in altero totus esse videretur ! Utriusque in pectore æstuabant , in vultu miscebantur angor , gaudium , spes , metus : in Rege tamen inter vestigia dolorum plus alacritatis ; in Reginâ inter lætitiæ scintillas plus timoris ; & conversâ amborum vice , quæ solatium allatura venerat , dabat lacrymas ; qui consolandus jacebat , blando placidoque nutu defixam in sese paventemque recreabat.

Adest Reginæ curarum consors , & altera etiam ipsius cura , subsidium Regni , lætum pignus posterorum felicitatis , SERENISSIMUS DELPHINUS , adest ; & quamvis primo armorum sonitu admonitus sui , in domes-

tiæ laudis æmulationem evolare gestiens, Parentis imperio in palatio contineatur, audito tamen & suo & Galliæ discrimine, sui jam non compos, eò citatissimo cursu rapitur, ubi spes, ubi amor, ubi totus animus est. In immenso dolore, qui pectori incubans universus dividi posse non videtur, vos tamen, ô Galli, partem aliquam habuistis: dum totus hæret in Patre Filius, vos quoque respectat, jam paterno erga vos plenus affectu, quem è LUDOVICI venis combibit; vestrique non minùs quàm sui in illo communis orbitatis metu miseretur. Cresce his animis, SERENISSIME DELPHINE: LUDOVICO Regiarum virtutum magistro diu fruire: tam jucundas caritatis erga nos tuæ testificationes nunquam è memoriâ deponemus: hanc etiam pulcherrimam hæreditatem relinquemus posteris, qui tibi diu florenti longas utinam gratias exsolvant eadem, quâ parentem tuum, quâ te jam prosequimur, pietate.

Nimiùm hære mihi videor in Patriæ vulnere, cujus dolorem nulla res adæquaverit, nisi gaudii magnitudo, quod reddito tandem votis fletibusque nostri LUDOVICO consecutum est. Nunquam celerius per totam Galliæ latitudinem ullius victoriæ fama pervolavit. Et bonum quidem nuntiabatur omni victoriâ latius; quippe fons victoriarum ac deliciarum pacis. Quot in formas mutari hilaritas potest, inter omnes animi motus maximè versatilis, tam varias induit eadem sub diversâ rerum facie lætitia: fervet ludis, splendet conviviis, stridet in flammis,

carmina ebullit; in cantus, in risus, in suavissimas etiam lacrymas effunditur. LUDOVICUM omnia loquuntur; inscriptum cordibus LUDOVICI nomen in omnium ore sonat, in omnium versatur oculis, in aëre etiam scintillat exaratum ignibus. O splendidae noctes, quae longam prosperorum dierum seriem portendistis, vestris collustrata luminibus Lutetia unum universa quasi theatrum fuit, gestiens acerrimâ simul & verecundâ voluptate! ô fortunati dies, quorum lucem incendere videbatur gaudium emicans ex animis, festis supplicationibus consecrata Civitas tota quasi Templum fuit! Tribus ferè mensibus Aedes Sacrae non conticuerunt, cum primò per universam Galliam resonaret, mox per singula summorum infimorumque collegia gratulatio divideretur. Ac ne in tanto fervore cessaret aliquod virtutis genus, quod quidem esset affine gratulationi, ad varias obeundas vices Christiana liberalitas non ingeniosam se minùs, quàm ipsa hilaritas praebeat. Hic læta & ridens pronubam agit, ac stipe dotali novum REGI parat militum seminarium; illic vicens & valida abrupit miserorum catenas, & aere alieno liberatos à situ & tenebris ad communis gaudii lucem stupentes educit; alibi velata & silens aut in publicas aut in privatas pauperum domos pleno sinu deportat subsidium morbis, egestati, orbitati; quasi salvo LUDOVICO quemquam in Galliâ miserum esse nefas foret: latandi genus, lætitiæ huiusce nostræ ingenio maximè consentaneum: beneficium Regem beneficiâ coli decet: redempti LUDOVICI

pretium fuit, quidquid pauperibus summi Regnatoris Procuratoribus ac Mensariis persolutum est.

Quid LUDOVICO jam desiderandum, si ad teneros erga se suorum sensus bellicum robur accesserit? Nec verò quisquam hac parte maneam ac debilem crediderit Gallorum in Regem suum caritatem, quæ ut habet pro REGE lacrymas, sic & eas exprimit hostibus, ubi necesse est. Divisus inter exercitus tam diversos LUDOVICUS, imò ubique totus, unde aberat, ibi etiam adesse, omnium militum eiere manus, omnium animos implere videbatur.

Quanta vobis, fortissimi Milites & CONTII Ducis & vestris laboribus nobilitati, quanta incumbere belli moles, quàm ardua, quàm multiplex! Vincendæ fuerunt & Alpes & ille REX, audaciâ & bellicis artibus vel ipsi par victori Alpium Annibali; vicistis. Neque veterano militi concedit novus miles; conclusi in dies paucos multorum annorum labores veteranos omnes fecêre: pendent scopulis hærentesque; ubi singulis in vestigiis expugnanda prius natura quàm cum hoste pugnandum erat, innixi alii aliis, armis non onusti sed quasi pennis adjuti, enituntur, adrepunt, evadunt: quæ fugere horreret inconsultus pavor, eà rapiuntur ad hostem ipsis periculi illecebris: frustra revocant duces; signis receptui canentibus obstreperit intus gloriæ vox, & minax hostilium tormentorum fragor validiùs in adversum vocat: per abrupta, per invia irruunt in eas arces, quæ vim nullam nisi

cœlestem formidabant : diceret Aquilas , cùm illi ex imis vallibus sese efferunt ; Leones , cùm obstantia disjiciunt ; fulmina ac procellas , cùm in summo vertice tonant immixti ipsi procellis ac fulminibus. Tales eos esse oportuit , ut rapidos Ducis impetus sequerentur.

Referebat ipsis LUDOVICI imaginem , ut sanguine , sic humanitate , liberalitate , fortitudine LUDOVICO proximus , dux , commilito , contubernalis CONTIUS : decorâ familiaritate erigit ad se infimorum animos ; nihil ex prædâ sibi vindicat , nisi militum amores. Ecquid impervium militi , quò CONTIUS antevolat ? Ecquid insuperabile , quod CONTIUS primus aggreditur ? Quantus ipsis , quàm terribilis apparuit , cùm ab hoste & acri & solerti , duplo majoribus copiis succincto laceffit , totum Martem & vultu & animo spirans , sanguine ac pulvere perfusus , confossis duobus equis , bis pertusâ loricâ , per stragem corporum & armorum , per horrendam infestis mucronibus tellurem , fiduciam suis , terrorem hostibus oculis , linguâ , manu circumferens , irritam aggredienti calliditatem luctuosamque fecit audaciam ! Quàm beneficus ac salutaris , ut LUDOVICO hâc etiam parte similis esset , post victoriam apparuit hostibus , quos faucios à suis in incendio relictos , ab hoste flammis creptos , primos victoriæ suæ gratulatores habuit , & ab ulularibus miseris ad faustos lætosque plausus traduxit , minùs de vitâ securos , nisi victi ac deserti fuissent ! Atque ut CONTII juvenus vel exercitatissimæ senectuti
par

par esse intelligatur, hunc in annum videntur casus omnes bellorum dedita opera convenisse, superandi montes, trajicienda flumina, perrumpenda munimenta, obsidiones, pugnae: supererat etiam unum, quod magnis animis ultimum semper ediscendum est; quod tamen si ignoretur, non possit esse omni laude cumulat bellator; quonam pacto integra gloria abscedendum sit, differendaque immatura victoria: id eum quoque edoceri contigit, ne quid ipsi ex Condæo aut ex Turenno deesset. In Te verò, PHILIPPE, ex secundâ Regibus Familiâ genite, cui quod Tibi paternum, quod fraternum, quod ab Henrico Magno avitum est, legitima hæreditas est adeunda victoriis, in Te exornando fortunam dixerim cum naturâ certasse, cum & Tibi ad regnandum viam natura aperuerit, & aditum fortuna ideo præcluserit, ut prius quàm imperares, imperatoriis Te virtutibus instructum esse comprobares.

Fervebant Alpes alacritate Gallorum: in singulis ferme saxis tropæa nostra defigebantur: interim in Flandriâ sustinendum bellum erat, eludendus carpendusque hostis, adversus multo majorem exercitum coercenda tribus jam incitata obsidiis fortitudo eorum militum, quibus hostem vincere quàm numerare facilius est. Ibi quoque, ubi satis erat si integra permaneret, crevit gloria Galliæ Gentis. Abstulerat Flandrico exercitu LUDOVICUS & roboris partem & conspectum sui: at, quæ duo validissimi præsidii loco erant, & sui memoriam reliquerat, & eum

Ducem , qui efficere maximè poterat , ut abesse LUDOVICUM & hostes & milites sui quàm minimùm sentirent. Is ad res maximas gerendas & ingenio factus , & assiduo studio ac strenuâ exercitatione eruditus , in Europâ nullum ingenti animo theatrum credidit esse Galliâ nostrâ opportunius , quæ semper maximè paruit peregrinæ virtuti. Amplissimis à LUDOVICO beneficiis nuper ornatus , attributa cognitæ fortitudini præmia prudentiæ consiliis remuneravit.

Haëtenus , ô LUDOVICE , quantum tibi Galli deberent , senserant satis : quantum reddere conarentur & morbi tui mœror , & gaudium restitutæ sanitatis , & edita in bello facinora tibi abunde declaraverant. Et tamen ut ille splendidus rerum gestarum ordo illustri aliquo fine clauderetur , sparsas antea multis in locis & LUDOVICI & Gallorum mutui amoris significationes unius urbis oppugnatio complexa est. Vix ereptus erat leto LUDOVICUS , ecce jam non sibi , sed suis consulit. Postquam studiosissimam sui Alsatiâ à luctu vastitatis & graviore etiam ob REGEM ægrotantem dolore , ad gaudia pacis & magnificentissimæ elegantiae lusus aspectu suo converterat , nondum confirmatâ valetudine , anni gravissimâ tempestate , suis lætitiâ relinquit , sibi assumit labores ; Friburgum se confert ; ibi inter incommoda convalescit , ex morbi malis inter belli asperitates recreatur ; sub frigido ac nebuloso cœlo , in ipsâ uligine , eam præ se fert constantiam , quæ sola apud hostes obstinatos suis omnibus

propugnaculis robustior videtur : Galli ab ægritudine recen-
 centes, durâ ætatis militiâ exerciti, renovatis LUDOVICI
 adventu viribus, duriorem etiam obsidionem fortiter
 aggrediuntur. Non pugnacis præsidii pertinaciâ, non urbis
 validæ munitionibus, non ipso naturæ bello, cum sævi-
 rent venti & imbres, fluvii exundarent, stagnantibus
 fossis, convulsisque pontibus, non ullâ denique malorum
 vi fracti conciderunt : aquis immerso corpore, capite
 cincto flammis hostilibus, ita tantum paludibus exstantes
 ut petere & peti possent, aut ad victoriam aut ad mortem
 pariter ruunt, utramque pariter REGIS sui conspectu
 commendatam. Vulnera suorum sua LUDOVICUS
 existimat ; sedulo injeicit gloriæ suæ moras, ut minus
 cruenta sit ; suos audaciâ ferventes vincere jubet seriùs,
 ut supersint plures qui victoriæ bonis gaudeant : Quo
 majorem suorum curam REX suscipit, eò magis eam ipsi
 abjiciunt ; is locus maximè placet, qui morti proximus
 est. Hanc in te indolem jam antea perspectam, illustrio-
 rem fecit tibi præclarum, nobis acerbum vulnus tuum, ô
 Subisi, qui in infestissimam stationem officii tui ratione
 adductus, frustra commonitus ut cautior esse velles, dum
 in ipso vestigio stas impavidus, militum periculum par-
 tiendo levans, ictu gravi percussus, cruentum fortitudinis
 tuæ testimonium ad REGEM tuum in castra retulisti ;
 & à REGE suavissimum lenimentum doloris ipsius allo-
 quio & gloriosâ tibi sollicitudine accepisti. Et cepit qui-
 dem patientiæ suæ fructum LUDOVICUS ingenio

suo maxime expetendum, ut parcere victis sibi liceret. Laboriosæ obsidionis tædio non exacerbatus, venientem ad se Præfectum urbis eo vultu excipit, quo solet suos, virtutis vel inhoste laudator.

Ecquis jam notior est aut suo populo REX, aut REGI suo populus, quam tu nobis, REX OPTIME, nos Tibi. Ut in pace jampridem, nuper in bello Tibi nos carissimos esse cognovimus; sic Te nihil esse nobis carius, per varias ætatis hujusce vices sentire Te maxime demonstraisti. Erit apud futuras ætates honorifica Tibi nobisque contentio, majores à nobis amores meritis ne sis an consecutus. O florentem & invictum tanto suorum studio REGEM! O nos REGES nostro felices, etiam spe posterâ fortunatos, qui ex SERENISSIMI DELPHINI connubio propagandam longius LUDOVICI virtutum hæreditatem prospicimus! Nunc quoniam ætatis præteritæ lux, quæ tot & belli & lætitiæ flammis effulsit, in placidam serenitatem REGIS ad nos reditu conversa est, deteriso tandem sudore, hanc hiemem quasi frigidam ardentissime dici vesperam jucundè agamus: ac dum LUDOVICUS in Gallia complexu à belli laboribus conquiescit; nos quoque & REGIS nostri, & quæ cum fatis ipsius conjuncta est, gloriæ ac victoriæ jam compotes, in ejus erga nos caritate conquiescamus.

CUM PERMISSU. Die decimâ nonâ mensis Decembris, anno 1744.
FEYDEAU DE MARVILLE.